

Radyo an Norvys

(<http://www.dasunys.net/podcast.htm>)

Titel: Nowodhow an seythur (28/11/07)

Auctour: Matthew Clarke

Dydh: 28 Du 2007

Pesyans: 00:06:11

An kreslu re lonchyas kaskyrgh war draffykya tus ha chiow hora.

I re settyas war jiow yn Truru ha Sen Ostell ha dalghenna an dus ynna.

Moy es kans gwithyas kres a veu usyes y'n oberans.

Bojet an tanlu a allsa bos treghys yn Kernow.

An governans re leveris na vydh moy a vona res dhyn may hallo bos gorsavow Kammbronn ha Rysrudh gwithys yn igor a-dro dhe'n klokk.

Agan eseli an senedh Westminster a lever bos sorr warnedha warlergh an ervirans.

Kernow a wra degemmeres trogh a bymp milvil peuns rag glanhe agan klavjiow.

An Gonis Yeghes Kenedhlek a vynn ladha klevesennow kepar ha C-Difficile hag MRSA.

A-varra hevlyna, hwithoryon a grodhvolas erbyn Treliste.

I a grydas bos Klavji Ryal Kernow yn-mysk an plossa yn Breten Veur.

Dadhel a-dro dhe lytherennans Kernewek veu synsys an seythur yw passyes.

An AHG a vetyas rag hwilas kessoilyans.

Res o dhe Ben Bruch dos oll an fordh a-dhiworth Ameryka.

Chons o ragov diskudha fatell yw studh a'n taves y'n dydhyow ma y'n pow na.

[CLIP]

An Edenna a vynn gwaynya hanter-kans-milvil peuns dhiworth an lotto kenedhlek may hallo drehevel asrann nowydh.

Gelwys via 'The Edge'... 'an amal'.

Byttagyns... yma an Edenna ow kesstrivya erbynnes peswar projekt arall rag an mona.

Yma rewloryon an projekt ow kovynn orthyn a ragleva ragdha.

Dyski a wren yn diw seythur mars yw an Edenva sewenyek.

Ha lemmyn an rygb... hag ass o pennseythun druan rag Kernow!

Yth eson ow keswel y'n kynsa le a-dro dhe'n derbi bras ynter Albion ha'n Vorladron.

Aberplymm a waynyas erbynno Gernowyon... naw poynt dhe hwegh.

Esher a fethas an Para Oll-Du yn unn weskel... an diwettha skor ena o naw-poynt-warn-ugens dhe dravyth.

...ha Rysrudh a gollas dhe Otley ...tredhek dhe seyth.

Ha Truru a dhallathas solempnya Nadelik y'n seythur yw passyes.

An golowys veu skwychys yn fyw hag yth esa keskerdh gwrys a ilewydhyon a bub eghenn.

Pymthek mil person eth dhe weles an diskwedhyans.

Ni a gavas y'ga mysk... Merv Davey... piber an Orsedh... ow seni ilow hengovek gans band samba...

[CLIP]

An brassa Morvleydh Drushya (Thresher Shark) bythkweyth y'n bys re beu kevys yn ogas dhe Benn an Wlas.

An kowr ma veu tennys 'mes an mor gans kokk pyskessa hag ev ow hwilas puskes erell.

Hirra yw es kyttrin... ha'y boester yw mil-dew-ha-hanter-kans peuns.